

## 李品初校長細說聖士提反堂中學創校歲月

受訪者：李品初（下稱「李」）

訪問者：記憶校園訪問組（下稱「訪」）

訪問日期：2010 年 10 月 2 日

---

訪：我哋係記憶校園訪問組，我哋最主要去追尋番我哋學校歷史。好高興你能夠接受我哋訪問。我想問吓，我知道你曾經擔任呢間學校嘅副校長，可唔可以介紹吓你嘅職務。

李：呢間學校應該係 1968 年開校，我就 1969 年入來，開校第二年入來，都係補充教師。嗰時好得意，距離依家三十幾年。我哋咩嘢都教。我自己本身係中國歷史。嗰時沒有中七、中六會考班，英文、西史、中文又教吓，比較特別，教咗唔知道幾多年。當時張副督，因為有一個做訓導主任辭咗職，佢就叫我做訓導主任。做咗幾年訓導主任後，張副督就走來：「做副校長啦。」咩都沒人教，就咁就做，喺聖士提反堂做咗十八年了。就做到'87 年，就去咗李求恩中學做校長，做咗十九年，到'06 年就退休了。退休到依家。跟過幾個校長，跟住申太。

訪：當時教育情況係點？即係學制，當時環境？

李：當年中一至中三…我初初入來嘅時候。環境就比較細一啲，個地方唔夠用，操場都小。呢個就係困難嘅地方。其他就係一般性，沒咩特別。啲學生好乖的。

訪：你之前提過，你做咗幾年教師，有沒啲難忘的事情？

李：剛剛講嘅最難忘嘅事情，人哋專科專教，初初嘅幾年我哋咩都去教。最好笑，同一班…中二，呢堂我主力教中文，呢堂完之後就英文 **oral**，又係我。我就收埋晒啲中文書，行番入教員室返來，就轉番英文台。好彩學生好乖，比起依家都係乖的。見到你哋做代表…有時同你哋啲老師聚會…「林 **Sir**，聽到啦」。呢個就係最慶幸嘅地方。啲老師好合作，好似周美華老師，大家都好融洽。雖然唔同層樓，好少學校層層樓有教員室…啲學校係有大教員室，坐幾十個人喺裡面。不過老師層層樓都有溝通，我哋就層層樓周圍去吓。困難都沒咩嘢。我哋…接你話講…係間私立學校，學生來源

沒咩大問題，因為係小學上來，經過幾年小學訓練。想番來，始終學生好啲，好過出面派來的。你唔知派咩來。小學自己經過六年，嗰時張振聲主任（馮玉顏之夫）…仲有一個主任…佢哋管得好嚴的，之後就到我哋管。不過問題就係個地方細啲，呢個就係最困難，細到連學校擴展工程都做唔到。你哋知唔知，好多年前開始政府出錢俾學校建多啲地方，但因為學校自己外面俾幾邊大廈夾住，又唔可以建多兩層。呢個係唔係咁容易克服嘅地方。不過好彩啲學生好好，老師又好好。有番咁理想啲成績出來。俾人感覺，唔係好豪華，你問學校好豪華沒用的，又游水池等等。但係如果你的學生出來，品行，成績又唔好。咁就虛有其名。我哋細細間，啲老師又做到盡心盡力教你哋，你哋又乖，就變咗有好成績出來。最好嘅就係睇到學生成績又好，出來又可以有事業成就。今晚仲約咗’82至’84年嘅中六精英班，沒見到佢哋三十年了，一陣去見吓。

訪：我整緊啲學校概覽，有校友會聚餐相、抽獎，好開心。

李：有幾個校友好出名，唔記得個名。佢加入咗校友會做校董，佢都搞得學校幾好的。（訪：余永俊？）係，余永俊係會計師樓做嘢的。

訪：李先生，因為依家張校長過咗身，我哋想問吓你關於佢嘅事蹟。嗰陣時，除咗做校長，佢仲兼任埋聖堂牧師，我想請問佢當時嘅職務會唔會好繁複？同埋嗰陣時學生嘅早會同崇拜，由佢帶領佢哋？

李：佢好特別的…應該 Ms Lau 都唔識張會督…佢係好特別，間間都有。佢係中學嘅校長，又係兩間小學上、下晝、幼稚園嘅校長。佢又係教會牧師、會吏長、副會督。佢好似又喺華僑日報做總編輯。所以佢住喺樓上有個宿舍。依家就牧師住，係唔係管牧師喺上面住？（訪：唔係。）

佢住係樓上，個人好好，好隨和。但係佢好少處理中學嘅事，佢坐喺小學個邊。中學樓下有校長室…唔係依家呢個…以前喺一樓…1A、1B…近電梯個邊。嗰陣嗰度有校長室，佢好少過來，如果佢過來就好大件事了。多數我哋過去…有事找佢。好多事都交代晒我哋去做了。初時沒副校長，有一個教務主任、一個訓導主任，即係我。後面就兩個合起來變一個副校長。因為有好多嘢俾晒我哋去搞，由唔識做到識，有呢個好處。跟住佢有一段時間身體唔好，就過咗身。一過咗身，就麻煩了。佢哋學校、教會個邊，冇話咁快找到正式校長。個陣就好多人來到代替校長個位。跟住有一個叫做張

紹桂會吏長夫人——張盧璞卿，佢係協恩校長。佢退咗休就走過來呢度做咗唔知幾耐，又過咗身。

我自己有一段時間都要做代校長，我嗰陣仲好年輕，唔知有冇三十歲。點搞啊？後尾申太過來了。佢就真係履行校長工作，克服咗一個困難，就係轉咗資助中學。因為整日都係非牟利學校係搞唔掂的，雖然有自己學生過來，但係始終設備，單維修就搞唔掂了。一次維修幾百萬，係政府規例。老師薪酬不能與外面掛鉤，係有好多問題。當時申太過咗來，同教會傾掂咗。轉做資助學校直到今日。早會呢度就好麻煩，因為沒禮堂。整日要過去教堂個邊，唔可以日日去嗰度，一個星期一次。（訪：我哋依家都係每個禮拜，分開高中同初中，大概一個小時到。）如果自己學校有禮堂就可以日日都有，可以全校一齊，就算分開都可以隔日。但呢度一個星期得一次。

我記得嗰時張副督唔來，都係我哋去搞。搞吓搞吓去到申太嗰時，佢自己就請牧師過來講道。因為我哋呢度有咗個禮堂，有咗個舞台。有陣時學生表演就笨重。一係就喺副堂下面，以前有幼稚園，唔可以用佢哋嘅副堂。喺嗰度就好啲咯。畢業禮，我哋都唔能夠喺度搞，要借隔離聖保羅書院禮堂搞。整日要喺人哋地方搞自己學校畢業禮。要找學校支校旗遮住人哋校旗，門口就聖保羅書院，入來嘅學生就係聖士提反堂嘅學生，就好似好得意。因為依家幼稚園個度，可以用番佢哋嘅副堂，喺嗰度有啲集會，有啲學生表演，畢業生表演，喺聖堂上表演、唱歌、跳舞。個個聖堂來的，喺度搞來搞去。不過依家喺樓下，喺副堂就好啲嘅。

訪：即係早期早會由你哋自己處理。當時張副督都真係好忙。

李：張校長係一個好隨和嘅人。冬天好凍，都係著一件短袖夏威夷 **shirt** 周圍去。最鍾意去食嘢，好多時佢得閒找埋我哋去食嘢。

訪：即係當時普遍大多數老師都好少機會見到張校長？

李：少的，我哋都好少機會。有陣時學校學期開始、教師會、請新老師就會見。嗰陣時都唔係佢見，都係嗰個教務主任見。見完 **pass** 就張校長見，見一陣咁就請了。不過好彩老師都係好人。

訪：其實你同張校長都共事咗一段日子，有冇啲比較難忘嘅事？

李：少啊，因為講公事多，不過佢好放手俾你做嘢的。唔會話唔信你。你俾人做嘢，最緊要就相信人，去到一個管理層都係的。佢就好少過問學校嘅嘢，佢知道你搞得掂就唔理你了。你有問題過去找佢，就自然會幫你去解決。當時就好彩沒咩問題。學生、老師冇咩特別問題。一班一班加上去，加到去中七…好叻叻的。依家學校嘅校長、訓導主任等等，坐晒喺度都咁多問題。所以一路十幾年喺呢度好輕鬆，困難嘅嘢唔多嘅。

訪：主要嘅困難因為初期需要金錢去維修等等？

李：資源都係一個問題。資助學校就政府出錢，資助所有嘢。但依家需要自己找錢，有陣時薪酬同資助學校相差得遠，好難留住啲老師。好難講，人有更好嘅出路。你之後嘅公積金都係一個問題，私校好難搞。依家就克服晒所有問題，始終校舍就比較難搞。但你細嘅校舍搞出好嘅成績就仲好。

訪：咁我想問吓呢間學校係教會學校，咁你覺得呢間學校有咩特色？

李：我初初來[時]，同其他學校沒咩分別。佢又唔係咁刻意灌輸宗教…有宗教堂。有一個特色你可以講，就係依家教會有幾個出名人士，主教都喺我哋學校教過書。榮休大主教鄭廣傑，佢做過我哋幾個月校長。徐贊生主教又來我哋呢度教過聖經。仲有邊幾個？林壽楓會吏長都喺我哋學校，依家係聖保羅堂法政牧師、明華神學院院長。呢度出好多教會出名嘅人。

訪：我想問初期張校長有冇親自教學校宗教科？

李：佢唔得閒來教，找牧師來教…聖經堂…會考班。

訪：我想問吓張會督有冇多同學生接觸、傾偈？

李：我諗少了，因為佢根本唔得閒，佢好少喺呢邊，見學生機會唔多。

訪：張校長除咗我哋學校校長，喺教會上有咩職務？

李：初初係牧師，跟住係會吏長，個陣時唔係叫主教…叫會督。嗰陣係白約翰會督，係外國人來嘅。佢講道用英文，要有一個人喺旁邊翻譯。佢講句英文，有個要講句中文，佢講道要 **double** 時間先講得完。咁就有個副會督，選一輪選咗張榮岳——張校長。依家就有了。就係成立教省，一個大主教，分開香港、九龍東同埋九龍西。三個主教，同以前就唔同了。佢做咗副會督好短時間就唔喺度了，跟住就沒副會督呢個位了。白約翰會督退咗休之後，唔知點樣，變咗稱為主教。

以前啲會督地位好高，差唔多港督之後。依家就變咗做主教。我接觸佢幾年，就過咗身了。但呢幾年都係我哋自己做自己，比較少過來，有時會過來巡吓，因為佢要上去上面佢宿舍，唔知六樓還是七樓，要經過我哋先入得去。

訪：我哋依家喺五樓個度。我想問吓，學校剛剛建係非牟利私立學校，同其他私校相比，你覺得我哋本校有咩特別優勝嘅地方？

李：剛剛講過，小學一條龍。上來小學，兩個主任，一男一女，一上一[下]書，一個張主任，另外女主任唔記得咩名了。好嚴的…管得。直接中一都係你哋上來多。到我哋去教你哋。整體性秩序，唔係外面咩都收，呢班優勝地方就係自己有小學，學生真係好乖的。問題梗係有啦，唔係…真係乖就咁你，但嗰啲問題唔係好大問題，直至教到依家。我出咗去見到另外啲學校嘅問題，我喺度個陣時，已經覺得你哋嘅問題係小問題。但當時小問題，我哋都係當好嚴重嘅問題去處理。唔準你哋呢樣個樣。個陣時嘅優勝地方就係咁，學生好。唔駛勞氣去處理秩序問題，企起到已經沒人出聲了。

訪：你覺得我哋係一個非牟利私立學校，建校初期有咩困難？

李：初期，我來嘅時候，又覺得沒咩大問題，可能嗰陣時年輕啦，同學生差唔多…同教中三啲，剛剛畢業。好似入去點名同啲學生大幾年。嗰陣時困難都係漸漸慢慢浮現，就係資源同埋地方。資源就解決咗，最緊要就係轉咗資助學校。嗰陣都碰到困難的，因為有一間教堂嚟住，會唔會覺得轉咗資助學校，連學校嘅地都好似要俾咗政府？有啲教友有啲疑慮，後來都解決說服佢哋，肯答應轉做資助學校。變咗資源分配好啲。

訪：咁我想問，創校初期，老師數目有冇話比較少，還是同依家差唔多？

李：要睇吓班數，因為我哋係非牟利私校等於依家直資學校，你請幾多個老師係你嘅事，你有錢請 100 個都任你請。人手方面唔係好大問題，夠人的。我哋初初去教，都係同依家老師節數差唔多。人手方面算係咁，但資源就出咗啲問題。

訪：喺建校初期，學校難免會遇到啲小問題、困難，教會會提供啲咩協助？

李：一路落去係非牟利學校會好難去做，特別去到中六、中七。我記得第一屆中六、中七，我得三個學生。所以變咗你唔可以繼續咁樣…人【哋】有咁多。教會個度唔係直接，因為聖公會學校特色教會唔可以直接干涉，或者好明顯去協助你。但係校長與校長之間團契就好好的，互相支援著。有咩問題就問吓有經驗嘅校長，睇吓點做。反而係禮拜堂呢邊，就算教會學校都有兩種，一種係獨立一個校舍，隔離沒禮拜堂。就算有禮拜堂，都可能係牧區嘅禮拜堂，都比較離開遠的。我哋喺隔離，就可以用呢度嘅資源，有時可以用樓下健身室，或者用呢度嘅地方。嗰度就直接去到教會就比較少啲，有時唯有請牧師來講道。所以咁多牧師走來教過聖經之後，就做咗主教。你哋可以找佢哋。變咗你唔駛額外去請人做傳道工作，有陣時早會，以前有幾個牧師喺度，早會可以請佢哋講吓道，就方便好多。早期沒校牧，係好後期先派來。因為呢度近教堂，個牧師過來做校牧就方便好多。好似【如果】我哋個教堂好遠嘅，個牧師點樣來做校牧，好似要佢來返工咁。

訪：我想問吓早期教堂換物會有咩特色？

李：同佢搞換物會搞咗好多年了，我都唔知幾時有換物會，唔知係唔係我一入來就有換物會。

訪：應該建校之前就有，嗰陣時聖堂要籌錢。

李：係啊！我哋起初就做雲吞麵檔…唔知邊個發起做雲吞麵檔，喺樓下，小學嘅地方煮麵食。找間雲吞麵舖…唔知邊個找，年年都來。搬晒啲工具走來煮雲吞麵。依家做就唔知有沒雲吞麵檔。（訪：依家沒了。我哋有啲相係度。）嗰陣時都冒險的，咁樣來煮雲吞麵。應該沒了，我前幾次都有來過，有啲小食。啲 **prefect** 眉頭都皺晒眉頭，要幫人哋拎雲吞麵。符唔符合衛生就沒人理，好多人食。小學就喺呢度搞小食。正式換物嗰度，有啲遊戲攤位的。幼稚園副堂就搞換物，換物就係禮拜堂搞的。搞吓搞吓，其中有一檔叫做…唔知叫咩檔，嗰啲阿太年紀大…沒咁多精力，搬呢樣嗰樣…唔

搞了。十點鐘一開門好似打仗咁，啲人湧入來。細聲少少都唔得。我負責籌錢，「你中學搞了」，咁又係我搞。錢就俾你，我哋去買嘢，返來就定價、包嘢。返緊學唔駛上堂，就走落去中環好多舊舖頭…石板街個頭…去批發…好平的。嗰班阿太後來番去天堂，變咗沒人籌錢。咁又要我哋自己去找禮拜堂幫手，一路搞到依家。幼稚園又係，我哋一齊搞換物。我哋又派啲老師、**prefect** 去。佢又嘉年華會…有少少攤位遊戲，好簡單…釣吓魚，找個鉤、找個帶，鉤一袋嘢。有時就扔吓嘢。玩就幾好玩，不過之前籌備好辛苦，嗰時好似有個家長，佢開玩具舖、開廠。先個女、後個仔入來讀。佢就好客氣，年年車幾車貨物俾我哋，呢個唔係好憂貨物嘅來源。整整吓退咗休，隔咗太耐，就唔好意思整日找人。咁年年都開大數，問佢拿多啲，我話留番啲下年用。依家就要自己出去買嘢，不過就好玩。前一晚，個個人出動晒，禮拜堂啲人返來佈置好晒個課室。第二日就開始了。都籌到錢嘅…嗰時。

訪：近幾年參與換物嘉年華時，你覺得同以前嘅換物會有咩唔同？

李：又沒咩唔同，呢一兩年我就少返來了。之前嗰陣時，佢哋都有請我返來做評判，睇吓啲攤位遊戲邊個好。返來都沒咩大分別，啲面孔舊個啲都差唔多，有一班教友好落力的。依家早咗開始，往日遲咗十一點幾開始，嗰陣沒飯食，整日落，找啲工友、婦女團煮雞飯、雞粥。我哋自己中學找啲咩姐煮飯食…臘腸飯…冬天啊嘛。整條臘腸食一碗飯，又去做嘢了。

訪：其實早期教堂換物會目的係咩？

李：為禮拜堂籌錢。

訪：咁禮拜堂唔關中學事？

李：關，禮拜堂係我哋堂校，我哋一家人來的，我哋都要去幫手。好多教堂都有…聖約翰座堂…好多都係。等於東華三院、保良局籌款晚會。睇電視就知啦，聽電話個啲唔知咩人。堂校一齊去做嘢，沒話分邊個邊個。

訪：當時換物會能唔能夠解決到當時中學嘅問題？

李：咁就唔知了，應該有佢嘅作用。你做開就年年都要做，斷咗一年唔做，再做番就會唔知發生咩事。咁就等禮拜堂、學生一齊有個聚會。依家唔知有沒找家長來，以前我哋就好少，沒家長來幫手，如果能夠找埋家長就更加好啲。

訪：咁我哋講完換物會，其實，李校長，我想問吓，喺張校長過身之後，我哋學校建咗一個張榮岳會督紀念堂，其實我想問吓佢嘅由來？

李：嗰個其實唔係我嘅時代，我走咗了，應該係申太時代。因為覺得學校嘅地方始終都係細。就唔知可能找多個呢個俾多啲學生，一來紀念張副會督，二來自己地方，有個坐係度，有個舞台嗰啲地方。唔駛吓吓唔知找邊度找個操場，又要搬檯搬凳。個陣係申太嘅時候，我係開幕先來的。應該都係紀念張副會督，二來俾你哋。一利一弊，操場咁細，整咗個就更加少地方，小息嘅時候。嗰時食物部來的…後面就搬咗食物部過來呢邊。初初食物部就係校務處，依家校務處係食物部。**1A, 1B** 課室就係校務處，我哋搬咗落去…校務處搬。因為擴充課室，越開越多班，之後就都建呢度。就搬番過來。

訪：我想問吓你，興建張榮岳會督紀念堂係邊個嘅主意？

李：咁我又唔知喔，應該係申太佢哋，提出之後就係校董會、禮拜堂傾。應該自己錢做。資源就唔知了，你有機會可以問番申太。因為我之後申太仲做咗一段時期，之後就過咗聖傑靈，之後就王校長，之後依家陳校長。所以呢十年、八年就係申太。

訪：李校長，我想問吓依家嘅校舍同以前有咩唔同？

李：個 **size** 就差唔多一樣，因為你沒得郁。因為嗰時你想擴建校舍，沒地方…俾大廈包圍住。咁樣擴建要向上發展，佢喺地下上面可以加一兩層，但呢度加唔到。咁就有唔同，就係個校務處，搬動比較…。其他個啲，嗰時要開到 **24** 班…。最標準嘅學校要開 **24** 班。少過 **24** 班資源就少好多…一定要保住 **24** 班。咁就唯有將校務處搬落樓下，樓上最頂嗰層仲係音樂室、籃球場…個度唔知俾唔俾人入。以前個籃球場喺嗰度都沒用嘅。沒人睇住…去到咁高嘅地方…唔可以俾學生自己係入面。咁樓下有幾個課室，校務處隔離建咗一兩個課室…個陣時就小食部。操場嘅空間都係細咗…依家係唔係就係出去上體育堂？



訪：唔係，我哋有一個健身室，其實因應情況，睇吓老師要教咩。有時，都會出去西區運動場。

李：試過有幾年堂堂都出去的，你問吓張國經？佢哋。搭巴士出去…去到薄扶林，你編時間表就好難搞，點樣返來上堂…一係就小息前。學校地方細，就少啲活動地方。咁依家學生上堂嘅地方就多啲，可以活動，小息嘅地方就小，擺個乒乓球檯都擺唔到，籃球架得嚟樓上嘅籃球場。咁就都係盡量有咁多地方用咁多…好似僭建。不過呢度全部都係入晒則了。

訪：我想問吓以前校舍空間有限，以前啲學生有咩活動，多數嚟邊度舉辦？

李：起初都係少，嗰陣時沒課外活動主任，都係嗰啲做副校搞埋。沒社工、輔導主任。你做副校長，訓導主任就要一腳踢。以前有幾個乒乓球檯擺嚟呢度。小息有嘢落來打乒乓球，一半就嚟走廊了。所以小息最好，企係依家棵大樹下，一望望過去，望晒幾層樓，郁不得其正…企係走廊度。課外活動小組都唔係依家咁多，運動會每年都有。水運會整整吓都沒了，因為搞水運會好麻煩。以前我嘅學校，我過去做校長都有水運會，不過整整吓覺得都係有啲困難。整間學校有幾多人游水？我嗰度 31 班，得幾十個人游水。全校要去服侍佢哋，金睛火眼睇住佢哋，唔值得。好似有個規例，真係參賽嘅學生，要保證識游水先放佢落去。咁我點知佢識唔識游水。你跑步唔同，人人都識，差在跑得好唔好。你跑跑吓可以停，游水唔可以停，會沉。咁就好多學校，除非好有訓練…有游水隊個啲，我去到自己學校我都唔搞。沒意思…幾十人用兩日嘅時間。變咗做運動會，其他活動…學校旅行。

訪：早期都有學校旅行？

李：有，我去到嗰時已經有了。

訪：會唔會話每級年年都係去同一個地方？

李：可能係，可能唔係，因為個級唔同，唔係嗰班學生了。嗰時都去到遠啲，坐旅遊車去…我哋自己帶隊…因為我哋學校停唔到旅遊車。我哋自己帶隊，一係去離島搭船，南丫島、長洲…去搭船…港澳碼頭，唔係依家呢個好複雜的。又唔著校服，唔知道邊個係邊個，第二間學校又去喔…亂晒大籠…嗰陣時好辛苦。最好就學校自己有地

方擺旅遊車，番晒來喺課室集合，然後一級一級上旅遊車。坐旅遊車，我記得有一次喺大會堂…喺大會堂出面嗰度有個空地。喺嗰度集合，要企喺張凳上面…好刺激…要點齊名、上晒車。有陣時旅遊車又唔來喔…去又唔來…返又遲到，要點齊名，最後一架車開晒，嗰陣時先叫做鬆一口氣。後來我哋唔揀星期五、或者學校假期前一日…好多人去的。不如星期一、二，唔駛咁多人。去旅行…啲老師最頭痛。

訪：當時旅行做啲咩？

李：旅行，啲學生自由活動、燒嘢食。你知道去到嗰啲…好多限制。有海灘，可以去，但係唔俾入水。一入水，好麻煩。有啲踩單車，唔知去咗邊，所以唔俾踩單車，所以啲學生跟住我哋好悶。我唔知你哋依家鍾唔鍾意去旅行，又唔準過夜。有時，學生有啲約埋自己啲 **friend**，佢又去喔，咁就唔知道邊個係。不過，乖學生都係自己守規矩。都完全沒咩大問題…十幾年旅行。反而，之後我喺第二間學校就有問題。因為啲學生比較弱。你哋嗰陣比較守規矩，我哋去到沒得睇住你哋，去到嗰度散晒！點睇？你哋都依時依候返來，沒咩大問題。咁唔知你哋學生覺得係唔係好好玩？就唔知了。

訪：會唔會話規定咗年年秋季，或者冬季先至去？

李：通常都係 11 月度。要遷就運動會，因為有時要抽籤。運動會唔係話個日就個日。旅行就可以。11 月一來沒風打，二來天氣涼爽。

訪：李校長我想問，學生放學留喺度打波、去吓圖書館等等？

李：都有的，不過就唔多。因為留喺度，沒特別活動地方。一般樓下操場，即係依家食物部嗰度，或者操場、或者課室，玩吓咯，沒咩特別。到 5 點就走了。

訪：李校長，除了旅行的課外活動，當時學生嘅學習生活同依家有咩唔同？

李：咁依家當然豐富好多啦，有各樣學會、興趣小組。連小學都已經多采多姿，一人要學一種樂器等等。嗰陣時，我哋都係少。沒咁多元化活動，一來限於地方問題，學會有幾多個？喺學校課室、校隊個啲咯，出面可能訓練吓籃球、足球，有時都會去參加學界比賽…朗誦等等。比較唔需要咁多地方、或者要去出面租借地方的活動。

訪：李校長，當時有聖誕節表演，呢個活動點樣來？

李：嗰陣時我都已經有了，每一班表演一個節目，喺副堂有比賽。

訪：呢個活動係唔係持續？

李：我唔係好記得了，總之我喺度做嘅頭幾年有的。聖誕節喺課室開 party、食嘢。到依家都有，好似唔駛著校服…唔記得了。嗰日…半日啫…喺課室玩遊戲、食嘢…有好多嘢唔準。有陣時，啲光管…唔係呢啲…係掉咗落來咁…過熱…會燒。有一顆聖誕樹…聖誕燈盞吓盞吓，放學就關咗佢。課室門玻璃，有啲中意封著佢，一張嘢「**Merry Christmas**」。我哋就唔準…係裡面做咩都唔知。好多嘢玩…有唔同活動…老師做評判，揀冠、亞、季軍出來。

訪：咁有冇啲難忘嘅活動？

李：我嗰陣時做班主任，嗰班跳支咩舞。

訪：老師有冇私底下傾吓究竟邊個班會贏。

李：有，唔知咩人做評判，唔記得了。

訪：以當時嘅資源，由學生去表演，都好成功了。

李：我唔記得邊個資助佢哋了，唔知係唔係自己出的。當時我做班主任，又沒人問我，跟住就自己整咗出來。可能班會的，呢啲唔係好豪華。我好似又沒拿過學校資助。喺夜晚添，一段時期…黃昏時候來的。

訪：有啲陸運會。

李：嗰陣時喺南華會。後來就抽籤，因為南華會貴。政府大球場入啲就南華會。後來就租政府大球場。就佢嘅期。抽籤抽得早，就排期早。第二時可以找申太。

訪：睇番以前啲相，學生嘅校服，會唔會同依家有咩分別？

李：都係綠色。沒改到校服，都係灰色嘅裙，男仔就灰色褲。都係綠色嘅燈芯絨。

（訪：依家沒燈芯絨。）燈芯絨難找啊，依家邊有燈芯絨。綠色嘅外套都唔係容易找的。變咗可能啲色係雜啲。唔同藍色，深深淺淺，一 **set** 過…綠色的 **tie**。嗰陣時，可能兩班…20 人。（訪：第一屆少啲人。）開校沒幾耐，唔係好多班，上到去中五。

訪：李校長，遊一遊學校，講吓當時嘅事情。（李：好。）一邊行，一邊對比，睇吓有咩唔同。我哋由九樓開始慢慢落。電梯一開學都有？

李：係，因為一初頭唔係我哋學校用，係禮拜堂用，一開頭上到二樓，閣樓。有陣時，佢哋揸車來，喺停車場上來，方便好多。音樂室一樣的。

訪：落雨次次走廊都好濕。以前都係一樣，電腦室就新加。以前地理室。上面啲名牌全部都係捐贈者。

李：嗯，佢哋係教友，捐咗一筆錢就找個牌俾個名佢。以前我喺度嗰時仲沒有的。

訪：自修室，以前有冇？

李：以前好似係洗手間。我哋以前日日望著呢度上堂，我哋同學生講呢個就係目標了。呢啲係你哋 **locker**？

訪：唔係我哋，係老師的。學生會室？

李：以前都係喺呢度。你哋仲有沒 **prefect council**？（訪：有，喺上面。）學長仲可以捉啲學生來罰，有老師在場。遲到唔係好嚴重，有個老師坐喺度，可以罰佢哋。

訪：依家都好似有，學長會議。

李：中六、中七有沒課室？

訪：有，係分部，以前小學嗰度。以前都有綠色長凳？

李：嗯。

訪：呢度去教會嗰邊，有條樓梯上。

李：整過地磚好好多。

訪：我想問以前係唔係都係呢啲簿架？好耐歷史，會唔會唔夠用？以前都係由呢度入聖堂？

李：噃，呢度過得去。（訪：前面有度門？）以前分開兩節，呢邊校長室。以前呢度食物部。依家食物部去咗邊？（訪：嗰邊。）

李：整多個教員室，依家多咗老師。學生會會長、總學長。

訪：係唔係有咗好耐？（李：係。）教堂嘅牆，以前都係咁有？（李：係。）

訪：我哋想問吓行前去後樓梯，有一個出口，以前學生係個度返學放學？

李：唔係。停車場有個入口入來。

訪：唔該晒你。拜拜！

**(訪問完)**